

文海出版社有限公司 印行

明代滿蒙史料

李朝實錄抄

十四冊

目次

仁祖實錄

仁祖元年(天啓三年).....	三
仁祖二年(天啓四年).....	一三
仁祖三年(天啓五年).....	三〇
仁祖四年(天啓六年).....	四一
仁祖五年(天啓七年).....	六〇
仁祖六年(崇禎元年).....	一七
仁祖七年(崇禎二年).....	二〇六
仁祖八年(崇禎三年).....	二八

仁祖九年(崇禎四年).....	二三四
仁祖十年(崇禎五年).....	二五五
仁祖十一年(崇禎六年).....	二六九
仁祖十二年(崇禎七年).....	二九七
仁祖十三年(崇禎八年).....	三〇七
仁祖十四年(崇禎九年).....	三二四
仁祖十五年(崇禎十年).....	三五七
仁祖十六年(崇禎十一年).....	四〇四
仁祖十七年(崇禎十二年).....	四一六
仁祖十八年(崇禎十三年).....	四三三
仁祖十九年(崇禎十四年).....	四五六
仁祖二十年(崇禎十五年).....	四七一

仁祖二十一年(崇禎十六年)……………四八二

仁祖二十二年(崇禎十七年)……………五〇四

仁
祖
大
王
實
錄

仁祖實錄 卷一

元年三月

[參]○丁巳備邊司啓曰今日鼎革之初事多未遑而西邊之事不可不急先料理伊賊倘來越邊接語則當云兩國曾無讐怨彼疆我界不須攙越擾害各守封疆可也你若動兵來侵我亦當以干戈從事至於唐將來住我境遼民越來投命於唐將皆非我國指揮你不可以此執言如是措辭荅送其接待等事今姑一依前例爲之今後凡係問荅之事一一告知毛將切勿隱諱爲當請以此意下諭于都元帥贊畫使平安監司義州府尹從之

元年四月

[參]○辛未上引見都元帥張晚於明光殿上曰今見唐將以協力討賊爲言

而兵事無形何以爲之晚曰大亂之後事勢固然但天朝師期尚遠一二年休息民生之後則民亦知不得已之舉必樂爲之用矣今聖算已定廟謨已決臣只許一死敢不盡瘁乎但以將才乏絕爲慮矣副元帥有闕而西路凋殘厨傳有弊若有緩急當臨時請之李适李曙中擇遣爲當上曰舉其優者偕往無妨晚曰軍官欲從略帶去而幕下多有褊裨則風采自別故不得已多率至於五百餘名第以接濟爲慮矣上曰卽今中原形勢其能出兵而討賊耶晚曰中原非但形勢孤弱亦似奪魄與我國壬辰畏倭同矣上曰倘與中原協力討賊則度用幾許兵晚曰臣之意則非十萬不可也上曰我國辦得十萬勢甚未易矣晚曰十萬雖不易得非五萬則不可上曰邊上將官率多匪人剝割無藝公私赤立必盡去貪官污吏事可爲矣晚曰貪官污吏朝廷必不饒貸臣亦受命下去敢不詳察以處乎上曰必須詳慎處之若一人枉被罪則十人當不服不可不慎上又曰他道軍兵年年徵發賊未來而國中先弊自今使本道之兵守城他道則臨

急調用如何晚曰臣亦有此意相議于領相則領相亦以爲然臣當下去與韓浚謙相議善處而李時發久在邊上必有揣摩亦當相與議處矣上曰賊勢如何晚曰有驚鳥斂翼之形矣上曰有將犯我國之勢耶晚曰賊方銳意犯關何暇東搶似無近憂矣上曰予意聞我國消息亦必忌憚矣晚曰兵家以間諜爲上臣欲募得假達伶俐者偵探賊中而不可不先告於毛將矣上曰卿言是矣告於毛將得剌漢厚待用之可矣晚曰我國善華語者剌其髮偕剌漢偵探而懸賞購募則必有樂往之人矣

○壬午上接見毛文龍差官時可達於明政殿上曰敝邦當與天朝協力討虜已拜元帥明當啓行使卽往詣督府奉議軍務矣若有軍機可議之事今日願爲詳教差官曰魚皮獐子事都督使俺奉議而來矣上曰所謂魚皮何地方耶差官曰魚皮獐子在中國東北所謂忽溫也上曰忽溫盡爲降附於奴賊未知有餘存者乎差官曰忽溫

雖降附奴賊而餘種數十餘戶合屯一處願爲歸附故招集行計於虜中矣上曰招集異類倘有漏洩軍機之患則抑恐無益而有害矣差官曰賢王睿算誠是矣當歸告摠帥也

〔參〕○癸未上幸慕華館送都元帥張晚〔下略〕

仁祖實錄 卷二

元年六月

○朔庚申孫軍門移咨朝廷羈縻聯絡作我援助云云備局以弊司方出都元帥調兵運餉以俟軍門之令協力毛督恢復遼左之意荅之

○辛未上晝講論語于文政殿〔中略〕時柳公亮自毛營還仍令入侍上問曰都督今則無有疑阻之意耶公亮對曰臣留都督門下一日別無致疑之色初因一時讒言發怒而非有深怨也我以誠意待之彼豈有不信之理乎以其兵力觀之似無勦胡之勢張晚去時結陣以見之而軍皆疲劣雖或見小利而動恐難舉大事耳上曰流民之來者幾許公亮曰數十里間流民盈路物貨販賣無異遼東矣上曰軍

兵器械比我國如何公亮曰兵器只於杖頭插鐵不比我國之精利矣蓋都督爲人只是一慷慨人自知與彼賊不相敵萬無出戰之理不過挾我國之勢爲山海關之殿後耳

○壬午咸鏡道六鎮藩胡等盡數撤入於深處情形異前本道饑疫亦甚監司李弘胄馳啓請令廟堂預講防備之策

元年七月

乙未○都元帥張晚馳啓言近接義州之報毛將已爲渡江游騎出沒於鳳凰湯站之間日日放砲以爲聲勢又聞易承惠等已自上流渡江其軍之單弱臣已目見其所聲言必曰合朝鮮之兵而乘虛入遼彼虎狼之移怒斷可知矣必將分兵侵我欲絕議後之計而兩西儲糧罄竭如洗雖欲收合軍卒添入邊上而無可饋之糧下道運餉無一缸來到者軍兵時未整頓器械未及修造將領未得其人督令

諸道餉臣催促舡運防秋諸道之兵依臣前啓亦宜早賜回下俾無
緩不及事之悔

元年八月

〔參〕○乙亥副元帥李适拜辭〔下略〕

仁祖實錄 卷三

元年九月

〔參〕辛丑○備邊司啓曰義州人南香等冒死應募剃髮變服偵探虜穴賊中情形大略探知本道雖已賞給而渠等今方上來自朝家不可不施賞以爲後人之勸上命兵曹論賞仍賜戰馬軍裝

元年十月

丙戌○毛都督設木柵置營鎮於蛇浦爲守冬之所接伴使李尙吉啓聞

元年閏十月

辛亥○上晝講大學于文政殿〔中〕知事李廷龜曰目今江水將合西事萬分可憂而自前我國不能偵探未知敵情與賊對壘朝夕待變

之日豈宜若此頃者走回人乃姜弘立金景瑞陷賊時手下兵也走回之時邊上郡邑當盤問顯末卽爲馳啓而漠然不知使之直到京中極可驚恠此人潛身上來安知非細作乎特進官朴鼎賢曰若是走回人則初豈不告於邊臣上京之後亦當來現於備局而只往姜弘立家及李時言處時言使現於備局而亦不來現誠可訝也且言姜弘立金景瑞領胡兵四萬將待合水出來云矣上曰姜弘立似不當叛本國水合出來之說亦不可信若是細作寧出此言且奴賊必不與弘立兵矣廷龜曰邊境之解弛據此可知宜令元帥申飭譏察上曰可矣〔中略〕上曰伊賊行兵非如我國有事便發其行甚疾而在我邊備如彼虛疎近來多有設弊者而未聞救弊之策未知將何爲也毛將或能相援否廷龜曰雖賊兵渡江都督必無出戰之理且其所率皆烏合之卒豈足爲用上曰漢卒皆已奪氣將自救不瞻安能救

我乎廷龜曰廢朝所大忌者戰也都督知其意故常以進勦夾擊等
言聲言於我而實則本無是意矣龜文龍始以孤軍遠涉海外聲言
滅胡招撫遼民數年之間遼民之歸者以萬計虜亦疑其議後不敢
專意西向其與中原聲勢相倚爲掎角之形其功亦不淺而今則徒
享富貴無意進取識者皆憂其終不利於中原而爲我國之深患

仁祖實錄 卷四

天啓四年

上之二年

正月

壬戌○時毛都督軍兵遍滿西路禍及鷄犬朝廷恐有意外之變請令伴使李尙吉懇諭毛將令除出其不合戰用者入送登州從之

〔參〕己卯○副元帥李适殺禁府都事高德祥沈大臨宣傳官金芝秀中使金天霖等舉兵反先是上變人以适父子爲逆首而上謂不必反只命拿來其子梅梅時在适軍中适遂殺都事等劫諸將作亂